

Regional News Unit AIR Aizawl

Tuesday, May 14, 2024

Time - 7:30 -7:40Hrs

## REGIONAL NEWS BULLETIN

### HEADLINES (MORNING)

- MBSE chuan vawiin chhun dar 12 hian kum 2024 Matric exam result a puang ang.
- Vawiin hian Lawngtlai ah Congress leh MNF tangdun sorkar din turin United Legislature Party hruaitu, South Lungpher bialtu MDC, Pu C.Lalmuanthanga chu Chief Executive Member atan lakluh a ni ang.
- Nimin khan Lok Sabha inthlan thawh lina atan tluang taka vote thlak a ni .
- Senior BJP leader leh Prime Minister Narendra Modia chuan vawiinah Varanasi Lok Sabha biala ding turin nomination a thehlut dawn.

<><><>

### MBSE TO ANNOUNCE HSLC RESULT

Mizoram Board of School Education (MBSE) chuan kum 2024 Matric exam result chu vawiin hian a puang ang.

MBSE hian vawiin chhun dar 12-ah puan a nih tur thu a sawi a, result hi anmahni pisa, Chaltlang, Aizawlah leh internet kaltlangin [www.mbse.edu.in](http://www.mbse.edu.in) leh [www.mbseonline.com](http://www.mbseonline.com) ah te en theih a nih dawn bakah a mamawh tan result bu a lei theih dawn a. Office hun chhungin WhatsApp leh phone call hmangin phone number 9863883041 leh 9863722521 te biak theih a ni dawn bawk a ni.

<><><>

### LESDE

Labour, Employment, Skill Development and Entrepreneurship Department hmalaknain Mizoram Team member 16-te chu trade sawmparuk a India Skills National Competition, New Delhi leh Karnataka State-a neih tura intihsiakna hmachhawn turin nimin khan an kal.

LESDE Secretary Pu Lalmalsawma Pachuau chuan intihsiaknaa tel turte lawmna leh duhsakna thuchah sawiin an kalna hmun apiangah Mizoram aiawh an ni tih hre reng turin leh, an chetzia leh nungchang thlenga ram tana mawi taka awm turin a fuih a. He intihsiakna hi India ram mai bakah khawvel huap pawha Mizo hnam ziarang, nihna leh themthiamna phochhuahna hmanruaa chantir ngei turin a fuih a ni.

Indiaskills 2024, National Competition-ah hian State hrang hrang atangin mi 500 chuang an tling a, trade hrang hrang 63 hmangin an intihsiak dawn a ni. Mizo thalai tel turte hi Bakery, Beauty Therapy, Cooking, Drone Film Making, Electronics, Electrical Installation, Fashion Technology, Floristry, Hair Dressing, Health & Social Care, IT Software Solution for Business, Patisserie & Confectionery, Painting & Decoration, Plumbing & Heating, Shoe Making, leh Visual Merchandising trade hmanga intihsiaknaah an tel dawn a.

He intihsiakna paltlangte hian WorldSkills 2024, Lyon, France-a kumin September thla a neih turah India aiawhin intihsiakna an hmachhawn leh dawn a ni.

LESDE Dept Director Pi Angela Zothanpuii chuan Mizoram aiawha kal turte duhsakna a hlan a, Mizoram hminga kal tur an nih angin theihtawp chhuah turin a chah bawk a ni.

Mizoram Team-te hi LESDE Department Officials paruk ten an hruai a. Intihsiakna hi May 14 – 16chhunga neihtur niin, Delhi leh Karnataka State ten an inthlen tawm dawn a ni.



## POL SITUATION

Upper Assam-a Rel kawng chhia vanga Mizorama tuialhthei harsatna chuan ziaawm lam a pan chhova, sorkarin tuialhthei pekchhuah a khuahkhirh a hlih hnuah zawi zawiin petrol leh diesel a lo thleng a, harsatna pawh sutkian zui nghal a ni.

Food, Civil Supplies & Consumer Affairs Department Director Pi Saizikpuii chuan tun dinhmunah Mizoram tuialhthei lakna Silchar-a IOCL depot ah tuialhthei a thlen that thu leh harsatna a awm zui a rin loh thu a sawi a ni.

Tuialhthei harsatna thleng denchhena dan lova man tova petrol leh diesel zuar chhawng te chu hrem theih an nih thu vawiin khan Aizawl District Magistrate chuan thuchhuah a siam a-Mi tumahin Aizawl District chhungah Petrol leh Diesel hi phalna nei lovin an zuar tur a ni lo tih thuchhuahah chuan tarlangin he thupek hi kar hnih chhung hman tur a ni.



## SUPPY DEPT NOTICE

Food Civil Supplies & Consumer Affairs Det chuan ration buhfai la ngailo te'n e-pos machine an hmeh loh avangin ration card block tumna sawrkar-in a nei lo tih thuchhuah a siam.

Tunlai hian 'ration buhfai khul ngailo ten e-pos machine hmeh vek tur a ni a, hmeh loh chuan ration card an block dawn' tiin thu thehdarh a awm ni a hriat a ni a, hei hi thu belhchian dawl lo a ni tih thuchhuah ah chuan sawiin, E-pos machine hmeh hi an ration an la ngei e tih finfiahna chauh a ni. Mipui ten an ration an la lo anih pawhin retailer-ten an tirirmai tur a ni lova, thla thara sem leh turin mipui tan an dah tur a ni a. Sawrkarin mipuite tan pawisa tam tak senga buhfai a lei chu e-pos machine kaltlang lova tihral mai chu dan bawhchhiatna a ni a, e-pos machine kaltlangin a dawngtu tur dik takte hnenah chauh sem tur a ni, a ti.

He thilah hian mipuite leh retailer zawng zawngte sawrkar tawiaawm tlat tur leh dan zawm tlat turin FCS&CA Department chuan a sawm tih a sawi bawk a ni.



## LADC

Thlahnih chung Lai Autonomous District Council ah Sorkar a kaltheihloh hnu ah vawiin chawhma dar 11:30 khian Lawngtlai LADC Hall ah United Legislature Party hruaitu, South Lungpher bialtu MDC, Pu C.Lalmuanthanga chu Lawngtlai DC, Pu Cheemala Siva Gopal Reddy chuan rinawmna thu tiamtirin Chief Executive Member atan a lalut ang.

Puan tawh thin angin LADC ah Sorkar mumal a awm theihloh hnu ah Congress MDC pakhat leh MNF, MDC 12 ten United Legislature Party dinin, an hruaitu atan Congress Member Pu C.Lalmuanthanga an dah a, a ni hian Governor hnen ah LADC ah a kaihhruai United Legislature Party in Sorkar an siam theih thu a thlen hnu ah Governor hian Pu C.Lalmuanthanga CEM atan a pawmna May 9, 2024 khan a tichhuak a, Pu C.Lalmuanthanga hi CEM atan lakluh a nih hnu ah Governor in ruahmanna a lo siamlawk tawh angin May 20, 2024 ah LADC Session ah CEM atan rintawkna a hmachhawn ang.

LADC ah Congress leh MNF ten Sorkar intawm United Legislature Party din an tum chungchangah Congress leh MNF hruaitute chuan LADC ah Sorkar a mumalloh chuan a tuartu chu mipui an nih vangin, mipui tawrhna thlengzel tur ngaingam lovin Sorkar intawm siam an tum tih an lo sawi tawh a ni.

<><><>

## ASF

Vawk pul hri African Swine fever avangin kum hian state chungah vawk 684 an thi tawh ni a report a ni a, ASF vanga suat tawh zat chu 387 a tling a ni.

Tunlai khawlum chhovah ASF hri a leng chho leh a, ran damlo nei an awm anih chuan Animal Husbandry & Veterinary Dept phone no 1962 ah Doctor te biak rawn theih reng an ni tih AH & Vety Dept Deputy Director Dr.M. Zohmingthangi'n a sawi a ni.

Akashvani Correspondent in a kawmnaah Dr M Zohminthangi chuan kum 2021 atang kumtin khawlum intan tirhin ASF hi a rawn hluar chhuak leh thin a ni, a ti a. Thlasik laiin ASF chu zia deuh thin mahse nipui a lo inherchhuahin a hri chu a rawn pung leh thin a. Vaccine rintlak tak hmuhchhuah ala nih loh avangin mipuite chu fimkhur a pawimawh takzet a ni, a ti.

Animal Husbandry & Veterinary Dept in a chhinchhiah danin nimin khan African Swine Fever (ASF) vanga vawk thi zat chu 11 a ni a, vawk suat zat chu 56 a ni a. Heng vawk thi te hi Muallungthuah 4 Ramhlun Sports Complex-ah 1, Hualngohmunah 1, Dulteah 2 leh khumtungah 3 a ni.

ASF vanga vawk thi zat hi Kum 2021-22 khan vawk thi zat chu 33417 a ni a, kum 2022-23 khan 12795 a ni a, kum 2023-24 chhungin 1139 niin tihian a vaiin ASF vanga vawk thi zat chu 47351 a ni tawh a. Vawk suat tawh zat hi Kum 2021-22 khan 12568, kum 2022-23 khan 11686, kum 2023-24 chhungin 980 niin tihian a vaiin vawk suat zat chu 25234 a ni tawh a. Vawk thi avanga tanpuina dawng chungkua 2488 an awm tawh a. AH& Vety Dept chuan ASF vanga vawk chante tanpuina tur cheng nuai 311.66 an dil mek bawk.

<><><>

## PROJECT WASTE FREE KOLASIB

Kolasib District Urban Development Office, Joint VC leh Sub Hqrs. YMA Kolasib tangkawp buatsaihin ‘Project Waste Free Kolasib, 2024’ thawhnhina atan Kolasib khawchhung a veng hrang hrangah bawlhhlawh thenfai hnatlang pui nimin khan neih a ni a. Venglai, College veng leh Project veng atanga hnatlang tur chhuakte chu Parkkawn ah inhmukhawm in Kolasib DC Pu John LT Sanga chuan a vailiam.

Pu John LT Sangachuan khawtlang fai leh hrisel siam tur chuan thawhhona tha neih a pawimawh thu a sawi a, tui hnar te humhalh leh enkawl thianghlim a tul thu DC chuan sawiin hemi tur hian kan bawlhhlawh leh leivung paih dan ah fimkhur lehzual a pawimawh thu a sawi a. Kolasib district chu faina kawng a hma hruaitu ni turin Sawrkar, khawtlang leh tlawmngai pawlte inlungual tak a hma la ho zel turin a sawm bawk a ni.

Hun kaihruaitu Pu Gilbert Lalhlipua, DUDO chuan tehfung hrang hrang hmanga khawpui fai inelna kalpui thin ah Kolasib chu a hnufual pawl an nih thin thu tarlangin October thla a Cleaniness Week chung a endikna neih leh tur ah chuan faina kawng ah hmasawna nasa zawk a awm ngei theih nan hma lak zel tum a nih thu a sawi.

Faina hnatlang pui neih mek ah hian Kolasib Town Area chung a Village Council hrang hrang ten khawtlang hnatlang kovin an mahni Area chung theuh ah hma an la a. Kawng kam, Tuihawk luan kawr te an thian fai a ni a. ‘Project Waste Free Kolasib, 2024’ hnuai ah hian DUDO leh CZS Higher Secondary School, Kolasib tangkawpin Tuichhuahen lui hnar a bawlhhlawh thian faina an lo neih tawh bawk a ni.

<><><>

## 4<sup>TH</sup> PHASE ELECTION

Nimin khan Lok Sabha inthlan thawh lina atan tluang taka vote thlak a ni a. Nimin zing dar 7 atanga tlai dar ruk thleng khan vote thlak a ni a. Hmun thenkhatah chuan vote thlak tur intlar an tam avangin dar 6 hnulamah pawh vote thlak chhunzawm a ni a. Hriat theih chinah nizan dar 8 thleng khan thleng khan chawhrualin vote vote zaa 62.84 a tla a. Andhra Pradesh ah vote zaa 68.12, Bihar ah 55.90, Telangana ah 61.39, Jammu and Kashmir ah 38.58, Jharkhand ah 63.37 leh Madhya Pradesh ah 68.63 a tla a. Maharastra ah 52.75, Odisha ah 63.85, Uttar Pradesh ah 57.88 leh West Bengal ah 75.94 a tla a ani.

Inthlan thawhli naah hian state pakua leh Union Territory pakhata Lok Sabha seat 96 ah inthlan a ni a. Voter vaibelchhe 17.70 chuang awmin an zingah hian mipa vaibelchhe 8.97 an awm a. Hmeichhe voter hi vaibelchhe 8.73 vel an awm bawk a ni.

Inthlan thawh lina neihna te hi Andhra Pradesh ah seat 25, Telangana ah 17, Uttar Pradesh ah 13, Maharastra ah 11, Madhya Pradesh leh West Bengal ah 8 ve ve, Bihar ah panga, Jharkhand leh Odisha ah pali leh Jammu and Kashmir ah seat 1 te an ni a.

Candidate 1717 an awm a. Candidate langsar zingah Union Minister leh BJP hruaitu Giriraj Singh, Arjun Munda, G Kishan Reddy, Ajay Kumar Mishra, JDU hruaitu rajiv Ranjan Singh, Samajwadi hotupa Akhilesh Yadav, Congress hruaitu Adhir Ranjan Chowdhury, TMC atangin Mahua Moitra leh Shatrugan Sinha leh AIMIM hotupa Asaduddin Owaisi te an tel a ni.

<><><>

## **PM MODI TO FILE HIS NOMINATION TODAY**

**Senior BJP leader leh Prime Minister Narendra Modia chuan vawiinah Varanasi Lok Sabha biala ding turin nomination a thehlut dawn.**

**Nimin khan Varanasi ah hian kawngzawh liantham tak a buatsaih a. Mi thahnem tak an kalkhawm a ni.**

**Hetihlai hian Congress hruaitu Rahul Gandhi pawh a dinna tur Raibareli Lok Sabha bial ah ngwrh takin a campaign mek a. A farnu leh Congress General Secretary ni bawh Priyanka Gandhi Vadra chuan a campaign pui a. Pu Gandhi chuan an sawrkar anih chuan loneitute loan ngaihdam a tiam a ni.**

<><><>